

tili solo posita, ut nullum illic æstuarium, nullus littoris flexus aut recessus, qui aliquando sinum fuisse testetur. Findornus fluvius ad duo milliaria inde oceanum subit, reflexo in occidentem ostio, unde nautis subeundo difficilis. Vnde conicere licet, vel æstuarium hoc exemplari delendum, cum nullum tale fuerit: vel nomen hoc ad Cromartie in diversa ora, quæ paucis milliariis in adversa ora hinc abest, ablegandum. illic sinus egregius, capacissimus, tutissimus, vestigantibus facilis, huc tanquam ad anchoram sacram adversis rebus in tota illa ora fuga nautarum est, qui scopuloso littore servat priorum sæculorum faciem. alter & proximus ei in illo littore sinus, quem dixi Sutherlandiam à Rossia dividere, id est Logos à Cantis, importuosus & navibus infidus est. Spæa deinde fluvius, totius regni à Tao secundus magnitudine, Ptolomæo ignotus, sequitur; ille navium impatiens nullum portum habet. At ejus Celnus fluvius in eodem littore magis ad ortum Dovernæ pulchre respondet, qui Banffiam urbem auri nostri ignotam aluit.

Ab hoc flumine, ubi littus paucis milliariis in ortum processerit, incipit in meridiem reflecti, ubi cernitur Tæzalum promontorium, hodie nomine Buchannes notissimum. hoc loco regio quam maxime in ortum procurrit, inde abest Diva fluvius ad viginti quatuor milliaria, interjectis duobus fluminibus Vgio & Ythanna, Romano sæculo innominatis. at Diva, paulum inflexo vocabulo, Dee hodie nominatur, qui ad duum milliarium in ostio interstitium

Donam fluvium comitem habet, veteribus indictum. Devanam urbem longe supra in mediterraneis locat Ptolomæus, ubi nullius unquam urbis, nec vola nec vestigium: hanc ego, conjectura nominis ductus, ad Deæ ostia collocavi, ubi hodie Aberdonia, clara urbs. Ad utrumque fluvium positæ urbes sunt veteres & novæ, nominibus distinctæ. Testatur Ge: Buchananus se in veterum scriptis invenisse hanc ad Deam Aberdeæ nomine appellatam. Hanc ad Deam Gregorius rex auxit, palatio ibi strueto, & monetaria officina instituta. acta hæc sunt circa annum DCCCC. Vidi ego monetam illic usam, sed posterioribus sæculis; longe vetustiore urbem fuisse arguit loci celebritas, præsertim uberrimo è duobus vicinis fluminibus salmonum piscatu, qui ab omni ævo nunquam defecit, cuique in hoc genere toto regno nihil par.

Post Deam sequuntur Mernia & Angusia, hodiernis nominibus dictæ provinciæ, ubi Pictorum regnum ad Boream initium capiebat. hic autem Grampii montes in mare desinunt. Ptolomæus horum locorum ut Tæzalum partem meminit. At Tacitus Horestas nobis commemorat, cum Agricola post victum Galgatum in Horestas cum exercitu deflexisse refert, quod fecisse videtur ut milites maritimis copiis reficeret, nam classis qui eum comitabatur videtur Taum subiisse: in hac ora ad Escam fluvium est Montis Rosarum oppidum, hodie Monros, scriptoribus nostris Celuræ nomine agnita.

